

# TAALBELEID VAN PRIMÊRE SKOOL GERT MARITZ

## AANHANGSEL B

AANGESIEN Primêre Skool Gert Maritz 'n openbare skool is kragtens die bepalings van artikel 52 van die Suid-Afrikaanse Skolewet, 1996 (Wet 84 van 1996), soos gewysig ("die SASW"), en artikel 62 van die Kwazulu Natalse Skoolonderwyswet, 1996 (Wet 3 van 1996);

EN AANGESIEN die Beheerliggaam van die Skool geregtig is, kragtens die bepalings van artikel 6(1) van die SASW en artikel 17(1) van die KZNOW, om die taalbeleid van die Skool te bepaal behoudens die Grondwet van die RSA, die SASW en die KZNOW;

EN AANGESIEN die Minister van Onderwys in terme van artikel 6(1) van die SASW norme en standaarde vir taalbeleid in openbare skole vasgestel het by wyse van kennisgewing in die Staatskoerant (Kennisgewing Nr. 1701 van 19 Desember 1997 gepubliseer in Staatskoerant nr 18546 van 19 Desember 1997);

NOU DERHALWE bepaal die Beheerliggaam van die Skool hiermee dat die taalbeleid van die Skool sal wees soos hierna uiteengesit:

### 1. DIE SKOOL EN BEHEERLIGGAAM SE BEGINSELS EN OORTUIGINGS RAKENDE TAAL IN ONDERWYS:

- 1.1 Behoorlike kommunikasie is onontbeerlik vir suksesvolle en sinvolle onderwys. Op sy beurt kan daar geen behoorlike kommunikasie wees nie tensy die opvoeder bedrewe en die leerder ten minste redelik bedrewe is in die taal van onderrig van die Skool.
- 1.2 Dit is nie in die beste belang van die leerder dat sy keuse van onderrigtaal aanvaar word terwyl sy bedrewenheid in die betrokke taal sodanig te kort skiet dat hy nie in staat is om volgens sy vermoë te presteer nie.
- 1.3 Die vordering van leerders wat genoegsaam bedrewe is in die taal van onderrig van die skool, behoort nie vertraag te word weens die toepassing van spesiale taalvaardigheidsprogramme of die toedeling van bykomende tyd aan leerders met onvoldoende bedrewenheid in die betrokke taal van onderrig nie.
- 1.4 Die voorvereiste van redelike praktiese uitvoerbaarheid wat gekoppel is aan die reg van 'n leerder om sy taal van onderrig te kies (soos vervat in die voormelde norme en standaarde), hou nie slegs verband met die hulpbronne van die Skool nie, maar ook met die mate waartoe dié leerder waarskynlik bevoordeel en die ander leerders waarskynlik benadeel sal word indien onderrig in die betrokke taal aan die betrokke leerder verskaf sou word.

- 1.5 Gebaseer op die huidige menslike- en materiële hulpbronne van die Skool, is die Skool ten beste toegerus om die opvoedkundige behoeftes van leerders met Afrikaans of Engels as moedertaal te bevredig. Derhalwe sal die behoeftes van sodanige leerders voorkeur geniet wanneer dit ookal nodig mag wees om die voorkeuorde van leerders se behoeftes te bepaal.

## **2. VERBODSBEPALINGS:**

- 2.1 Daar mag nie onregverdiglik teen enige leerder gediskrimineer word, direk of indirek, op grond van sy taal nie.
- 2.2 Geen taaltoetse mag afgeneem word as voorvereiste vir toelating tot die Skool nie: Met dienverstande dat die Skoolhoof geregtig is om 'n leerder toelating tot die skool te weier indien die prinsipaal in goeie trou en op redelike gronde glo dat sodanige weiering in die beste belange van sowel die applikant leerder as die ander leerders sal wees, weens die gebrek aan bedrewenheid van die applikant leerder in die taal van onderrig van die Skool.
- 2.3 Dit is wel 'n vereiste dat 'n leerder wat aansoek doen om toelating tot die skool, die twee onderrigtale wat die skool aanbied, in die vorige skole gehad het. Dit sal verhoed dat die gebrek aan bedrewendheid die leerder self, en ander leerders, ernstig benadeel deur sy/haar onvermoë om op die vereiste vlak vir behoorlike onderrig te kommunikeer of mee gekommunikeer te word;

## **3. TAAL VAN ONDERRIG:**

- 3.1 Die taal van onderrig van die Skool is Afrikaans en Engels.
- 3.2 Elke leerder of voornemende leerder het die grondwetlike reg om onderrig te ontvang in die amptelike taal van sy keuse by 'n openbare skool, met dien verstande dat onderrig in sodanige taal redelikerwys prakties uitvoerbaar is.
- 3.3 Die ouer van die leerder oefen namens die leerder die gemelde reg om die taal van onderrig Afrikaans of Engels te kies uit. Hierdie keuse moet gemaak word by aansoek vir toelating van die leerder tot die Skool.
- 3.4 Waar die taal van onderrig deur die applikant leerder gekies dieselfde is as die taal van onderrig van die skool en met dien verstande dat daar plek vir daardie leerder in die betrokke graad is, moet daardie leerder tot die skool toegelaat word, onderworpe aan enige moontlike wetlike rede waarom sodanige toelating geweier kan word.
- 3.5 Die Skoolhoof moet 'n rekord hou van alle versoeke vir onderrig in 'n ander taal as Afrikaans of Engels.

#### **4. BEVORDERING VAN VEELTALIGHEID:**

- 4.1 Die Beheerliggaam verbind homself en die Skool tot die aanbied van Engels as Eerste Addisionele taal vir Afrikaanse leerders en Afrikaans as Eerste Addisionele taal vir Engelse leerders, as volwaardige taalvakke by die Skool.
- 4.2 Geen ander taal behalwe die twee amptelike tale aangewend vir onderrig en leer word aangebied nie.
- 4.3 Onderworpe aan beskikbare fondse sal die skool toepaslike Afrikaanse en Engelse boeke en leermateriaal aankoop vir gebruik deur leerders en opvoeders van die skool, met die oog daarop om hulle bedrewenheid in bogenoemde vakke te verbeter.

#### **5. KOMMUNIKASIE MET OUIERS:**

Aangesien die ouers van die skool Afrikaans en Engelssprekend is onderneem die Beheerliggaam om, waar prakties moontlik, met alle ouers in òf Afrikaans òf Engels te kommunikeer met verwysing na die omsendbriewe wat van tyd tot tyd aan ouers gestuur word en ook die akademiese rapporte van die leerders.

#### **6. TALE AS VAKKE:**

- 6.1 Die toedeling van tyd en hulpmiddele moet eweredig versprei wees met betrekking tot alle taalvakke wat by die skool aangebied.

#### **7. ALGEMEEN:**

Die opvoedingsproses by die Skool moet daarop gemik wees om 'n kultuur van respek vir die land se diverse taalgemeenskappe te kweek.

#### **8. HERSIENING:**

Hierdie beleid moet van tyd tot tyd op deurlopende basis hersien en verder ontwikkel word.

**AANVAAR DEUR DIE BEHEERLIGGAAM OP 06 NOVEMBER 2014**

---

**A.G. OPPERMAN**  
VOORSITTER

---

**MEV. C.A.J. VAN TONDER**  
SKOOLHOOF